

Bulu - Nsisim Wosane Mintilan - SW Intro Scriptures

Lukas 17:5 Minlôman mi nga jô Nti na: Kô'ôla'ane bia mbunan.

Rôme 10:17 Ajô te mbunane wo so nkatane foé, a nkatane foé ô ne nkañetane ya ajô Krist.

Lukas 11:1 Yésus a mbe a ye'ela'ane môs éziñ e vôm éziñ. Eyoñ a nga man, wua ya beyé'é bé awôm a mebaé a nga jô nye na: A Nti, ye'ele'e bia ane bi ye'elan, avale Yôanes a nga ye'ele beyé'é bé.

1 Timôté Ôsu 2:1-4 Nde ma bendé ôsusua ya mame mese na, be bo minja'an, meye'elan, mbane ya sili, mvean akéva mfa'a bôte bese. 2 Te vuane bejô bôt a ba bevo'o bese be bili bito bi ne ôyabe yôp.

Nalé bia ye nyiñ évôvoé a mvo'é e mbunane Zambe a éjijin été. 3 Jame te e ne abeñ a mvaé e mise me Zambe nyii wongan, 4 Nye a kômbô na bôte bese be nyiiban, a kui vôme ya yeme benya mejô.

Zakari 3:1,2 Eyoñe te Nti a nga liti ma Yasua, Ntuni nnen, a tele éngele Nti ôsu: ve Satan a nga tele nye mbo nnôm, asu ya bo'olô nye. 2 Engele Nti a nga jô Satane na: Nti a dibe wo anyu, nyô émien a nga tobe Yérusalém. Ve mfa'a Yasua, ye a nji bo ési'i be nga vaa nduan?

Efeze 6:12 Bi nji wosane metyi nge minsôn, ve bi jôé, betebe ôsu, a bejôô ya dibi, mimbia minsisim mi ne yôb été.

Efeze 6:10,11 Ma su'ulane jô na: Bo'one ngul e be Nti, a e ngule já dañe ngul ése. 11 Jaéne biôme mewosane bi Zambe, ane mi ne dôngan atyeñe mimboon mi Satan.

Efeze 6:13-17 Ajô te biane biôme mewosane bi Zambe, nde éyoñe mbia môs wo ye kui, mia ye bo ngule ya yeme ngu a tebe ne sim, a koone na mi maneya bo mam mese. 14 Teba'ane ñhe tetele! Mi jaé bebelá mengeteñ ane kandé, zôsôô ane ében, 15 dulu ya kate Mbamba Foé mvo'é e mebo ane bikôndé. 16 Mi dañe nyoñ ébene mbunan, ja ye ve mia nguleya dime mekoñe me nduane Satan. 17 Mi su'ulane nyoñ ékôngô nyian a nkpwaté mekône Nsisim, e ne na: Mejô me Zambe.

Hébre 4:12 Amu mejô me Zambe me ne vevee a ngu. Me ne akap, a dañe ékpwelé é ne meyo mebaé. Ma tulan a kui vôm ényiñ a nsisim ba tôban, ja'ane mua me nyôl a foñe bives. Ma yemelan minkômban a minsimesane ya nleme môt.

Lukas 4:8 Yésus a nga yalane nye na: e ne ntilane na: Wo ye kañe Nti, e Zambe wôé, a asu dé étam e nde wo ye bo bisulan.

Efeze 6:18 Nsisim a va'a mia ngu e meye'elane menan mevale mese, e minja'ane mienan, biyoñe bise. Bela'ane mbômban évevé wônan, asu meye'elan te kat, ajô mimfufube mise,

1 Samuel Ôsu 17:45-47 David kik a nga jô mone Filisteñ na: Wo wo zu wosane ma a nkpwaté mekôn, mon akoñ a ngamb'akoñ; ve ma ma zu wosane wo a jôé Nti ya minsamba mewosan, e Zamba minsamba y'Israél e mie ô maneya soñ. 46 Den Nti a ye ve wo e mo mam, ma ye wôé wo a tyi'i wo nlô, den ma ye ve mimbime ya Befilisteñ e be anone ya yôp a betite ya si a si ése ja ye yeme na Israél a bili Zambe. 47 A ékôane bôte jina ése ja ye yeme na: Nti a nji nyii a nkpwaté mekôn ng'akoñ amu mewosan me ne jôme Nti a aveya mia e mo mangan.

Lukas 10:17-20 Bemewôme zamgbwale bete be nga bulan a jô na: A Nti, ja'ane mimbia minsism mia wô'ô bia a jôé dôé. 18 Yésus nye be na: Me mbe me yenek Satan a so'o yôp a kpwa'a si ane feleves. 19 Mi lôô, me nga ve mia ngule ya wulu benyo yôp a alé, a nguleya wulu e ngule nsiñ ése, a teke jôm éziñ é ne ngule ya ndeñele mia. 20 Ve da, te mia vak amu minsism mia wô'ô mia, ve va'an amu môé menan me ntoo ntilane yôp.

2 Koréñt Baa 10:3-5 Bôt, ane bi né, bi nji wosane fo'o ve aval ane bôt. 4 Momo, biôme mewosane biangan bi nji so e be bôt, ve ngule jap ja so e be Zambe, mfa'a ya tyam alem. Bia tyam asimesane befe'e, 5 a ngul ése ja liti ziñ, nje éte ja tebe ñyemane ya yeme Zambe e ngame yat. Bia bi ôsimesan ôse mbôk asu ya zuu wô na ô ve Krist mewôk,

2 Timôté Baa 1:7 Amu Zambe a nji ve bia nsisime woñ, ve Nsisim ô ne ngu, nye'an a wu njôane nlem.

Metias 12:28,29 Ve nge ma vaa mimbia minsism a ngule Nsisime Zambe, yemane ñhe na éjôé Zambe é kuiya be mia. 29 Nge na: Môt éziñ a ne nguleya nyiin e ndaa ngungule môt aya a mane nyoñ akume dé, nge a nji taté mane ka'a ngungule môt? A su'ulane zu sa nda jé.

Efeze 1:13 E be nye fe, mi nga wô'ô bebelia nkobô, E Mbamba Foé a nyii mia. Avale dada te fe mi nga buni be Nye; A Sitame Nsisim ô mbe ngaka'a, Mfufube Nsisim a nga lômbane be mia,

Mimboone Minlôman 19:6 Paul a nga beté be mo. Ane Mfufube Nsisim a nga zu e be be. Be nga kobô minkobô mife a kulu mejô.

Markus 16:15-18 Ane a nga jô be na: Kelane mefôla me si mese, mi ke mia yôtan ékôkôma'a ése Mbamba Foé. 16 E môt a ye buni a duban, a ye bi ényiñ, e nyô ki a ye bo teke buni a ye nyoñe mekua.

17 Mendeme ma ye tōñe bôte ba buni e me ma: E jôé dam, ba ye titane mimbia minsisim, ba ye kobô mimfefé minkobô. 18 ba ye bi benyo a mo, a nge ba nyu e jôme ja wôé môt, ja ye bo teke bo be mbia jam, ba ye beté minkôkon mo, mi ve bo mvo'é.

1 Yôanes Ôsu 1:9 Nge bia mem mam abé mangan, e nyô ya tabe nye ndi a zôsôô aval a ne a né, a ye fo'o jamé bia mam abé mangan a tune bikotekote biangan bise.

Nkôlan 20:5 Te kute bie meboñe si nge kañe bie, amu me ne Nti e Zambe wôé, nyô a ne aban, nyô a ve bon melep amu abé b'ésaa bap, akekui miaé lale nge miaé nyini ya ba ba vini ma,

Besam 109(108):17 A nga yene mvaé ya yo'é nde ñhe, biyo'é bi za'a be nye! A nji kômbô botan nde ñhe bibotan bi kôlô'ô be nye!

Betyi'i Mejô 16:16 Amu Dalila a nga dañe ndeñele Samson a mveane ya ve nye bijô môs ôse, nde Samson a nga dañe tek, bebé ya wu, a dimili fek,

Efeze 4:26 Ye mia yaa? Ve te boon abé, Jôp e bo'o te dim aya denan e too.

Rôme 14:12 Ajô te môt ase a ye yalan ajô dé émiene be Zambe.

1 Yôanes Ôsu 2:23 Nyô ase a sôane Mon, a nji bi Esaa. Ve nyô a meme Mon, nye a bili fe Esaa.

Yoanes 14:6 Ane Yésus a nga jô nye na: Ma me ne zen, me to fe bebelà, a ényiñ. Teke môt éziñ a ne ke be Tate, nye teke lôte be ma.

Metias 11:28-30 Za'ane be ma, mia bese mia wô'ô njuk amu adite mbe'e a ma ma ye ve mia awo'on. 29 Beka'an éboñeté jam a yéka'ane be ma, amu me ne évôvoé a nleme nje'ebane si a mia ye yen awo'one ya minsisme mienan. 30 Yaa, ébôñeté jam é ne tyi'ibi ya be'e a mbe'e wom éeveves.

2 Koréñt Baa 6:2 Amu a jô na: Eyoñe ja yian, me nga yalane wo, a e môse nyian, me nga volô wo. Tame yen, éyoñe ji é ne mbamba éyoñ. Tame yen éyoñe ji é ne môse nyian.

Rôme 10:13 E ne na: Nyô ase a loone jôé Nti a ye nyiñ.